

六朝事迹編類卷之九

左奉議郎充江南東路安撫司幹辦人重張敦頤養正譔

靈異門

新洲

南史宋武帝伐荻新洲見大蛇長數丈射之明日復至洲裏聞有杵臼聲往覘之童子數人皆青衣於榛中擣藥問其故答曰王為劉寄奴所射合散傳之帝曰王神何不殺之答曰寄奴王者不可殺帝叱之皆散收藥而反今薛家洲蓋其地也屬金陵鄉去城北四十里

八功德水

蔣山悟真菴後接梅摯亭記梁天監中有胡僧曇隱寓錫於此山中乏水時有龐眉叟相謂曰予山龍也知師渴飲措之無難俄而一沼沸成後有西僧繼至云本域八池已失其一似竭彼盈此也其泉一清二冷三香四柔五甘六淨七不鱧八蠲疴故名八功德水自梁已前嘗取給御廚又按楊修之詩注云高僧曇隱遊行於此忽聞金石絲竹之音俄見清泉一泓瑩徹甘滑有積年疾者飲之皆愈

誌公鱸殘魚

高僧傳寶誌嘗對梁武帝食鱸帝曰朕不知此味二十餘年師何為爾誌乃吐出小魚鱗尾依然今金陵尚有鱸殘魚

郝氏化蛇

郝氏梁武帝皇后也崩數月帝常追悼之晝則忽

忽不樂宵乃耿耿不寐居寢殿聞外騷宰蘇骨切

中出聲視之乃一蟒盤躡上殿睽式冉切說文睽

呀香牙切張口貌口以向於帝帝大驚駭無所逃遯不得

已蹶然而起謂蛇曰朕宮殿嚴警非爾蛇類所生

之處必其妖孽欲崇朕邪蛇為人語啟帝曰蟒則

昔之郝氏也妾以生存嫉妒六宮其性慘毒怒一

發則火熾矢射損物害人死以是罪謫為蟒耳無

飲食可實口無窟穴可庇身飢窘困迫力不自勝

又鱗甲有蟲啞子合啞切咬玉狡肌肉痛苦甚劇若加

錐刀焉蟒非常蛇亦復變化而至不以皇居深重

為阻耳感帝平昔眷妾之厚故託醜形陳露於帝

祈一功德以見拯拔也帝聞之嗚呼感激既而求

蟒遂不復見帝明日大集沙門於殿庭宣其由問

善之最以贖其苦誌公對曰非禮佛懺滌悃款不

可帝乃然其言搜索佛經錄其名號兼親抒睿思

灑聖翰撰悔文共成十卷皆采摭佛語削去閒詞

為其懺禮又一日聞宮室內異香馥郁良久轉美

初不知所來帝因仰視乃見一天人容儀端麗謂

帝曰此則蟒後身也蒙帝功德已得生忉利今呈

本身以為明驗也慇懃致謝言訖而去此見梁武

懺序

燕雀湖

輿地志云走馬橋見有燕雀湖窮神秘苑曰梁昭明太子在東宮有一琉璃盃紫玉杯皆武帝所賜也既薨詔置梓宮後更葬開墳爲閹人攜入大航乃有燕雀數萬擊之因爲有司所縛乃獲二寶器帝聞而驚異詔以賜太孫封墳之際復有燕雀數萬銜土以增其上墳側今有湖後人因名燕雀湖楊修之有詩云平湖岸側見高墳萬土銜來燕雀羣鑑面無波天一色此中文藻似儲君在城東四里下入青溪

生人蓂

南史梁阮孝緒字士宗母王氏有疾合藥須得生人蓂舊傳鍾山所出孝緒躬歷幽險累日不逢忽一鹿前行隨後至一所遂滅就視其處果獲此草今山中不復有之

木醴

建康實錄陳後主禎明二年初覆舟山及松柏林冬月出木醴後主以爲甘露之瑞俗呼爲雀錫舊立甘露亭今廢

牝狙觸網

按湘山野錄云南唐李後主獵青龍山一牝狙觸網見主兩淚稽顙屈指其腹主戒虞人保守之是夕誕二子還幸大理寺親錄囚繫一大辟婦以孕在獄未幾誕二子煜感牝狙之事罪止於流其山去城二十五里

感龍產鯉

昔民有女感黑龍於田野歸而有娠後產鯉魚投於水中復能變化隨母所出入後成龍而去母亡每春時必來墳所鄉人懼之因立廟祠焉謂之烏鯉廟在溧水縣東南二十五里

六朝事迹編類卷之九終

光祿寺署正上元李濱古漁重校刊